



# Ositrán, notsipatami nokenayeti anampiki Perú



Iro amitakotake ora:



PERÚ

Ministerio  
de Educación

 OSITRÁN



PERÚ

Ministerio de Cultura



**Organismo Supervisor de la Inversión en Infraestructura de Transporte de Uso Público**  
Calle Los Negocios 182, piso 2. Surquillo

**Iko okantanaka isankenatakoitiro kenkitsarentsipe “Ositrán, notsipatami nokenayeti anampíki Perú”**

Osankenaatkota kenkitsarentsipe iroperotaintsiri

**Verónica Zambrano Copello**  
Jibabentirori ora Consejo Directivo

**María del Rosario Bazalar Huamán**  
Amenakotirori ora Oficina ashi Comunicación Corporativa

**Amenakotakerori**  
Ricardo González Vigil  
Anahí Barrionuevo  
Leonardo Dolores Cerna

**Abiakerori:**

**Isankenatakeri oametaripe**

**1.<sup>er</sup> puesto**  
Gamesitrán  
Nicolas Jhazel Pauro Ortiz  
Institución Educativa Los Peregrinos (Lima)

**2.<sup>do</sup> puesto**

Añantantsi aabakachari  
Gabriel Ochoa Gonzales  
Institución Educativa Alfredo Rebaza Acosta de Los Jazmines (Callao)

**3.<sup>er</sup> puesto**

Obanenkaroo antami (selva)  
Richard Del Piero Saavedra Montez  
Colegio de Alto Rendimiento (COAR) San Martín

**Isankenatakeri oametantatsiri**

**1.<sup>er</sup> puesto**  
Ajate nampitsiki jitachari Inkite  
Sergio Cuipa Garcia  
Institución Educativa Fractal (Cañete)

Iro oinjantakerori ora Oficina de Comunicación Corporativa  
Noviembre, 2023

Ari osaikotakeri ara jitachari Biblioteca Nacional del Perú N° 2023-11439  
Impreso por: Inversiones IAKOB S.A.C  
Jr. González Prada 615, Surquillo.

Derechos reservados



## Oinijantsi

Ajibatakayero betsikantsiyetatsiri jero kenkitsarentsiyetatsiri yotantsipankopeki timatsiri anampiki, okantakota okoasanotantari ontima kareterape, aatayetira pitotsipe, aniyetira arakomentotsipe, okenayeira jitachari tren jero irori línea ashi metro yañantajeityari kametsa atiripe, okenkishiriakajei amitakotajero yotanetantsi yotantsipankoki aka aberakaka iko osarentsi isankenatakoyetiro kenkitsarentsipe "Ositrán, notsipatami nokenayeti anampiki Perú".

Ñanarentsikika, aikero aijatakakero eiro ajokantaritsi kari añaabentakotapinite, irotakekea apayetantakariri osanekantya kenkitsarentsipe pashinipeci ñanetantsi timatsiri anampiki Perú. Ari meka, obametinkaripe jeri oametari berainchari iñanati ara intarori, apitetaintsiri jero mabataintsiri akantajeitakeri isankenajeite kenkitsarentsipe iñaneki, osheki antabetake Ositrán aretantlyariri janenekipe isankenatantyari.

Nimoshireti impoiji akantasanojeiti, okameka iko akajemakanti osankenayetya kenkitsarentsipe iyoyetiri jananekipe jero obametantatsiri okantakota iroperoti kareterape ashiyakojeitancyari jero antakantiri Ositrán nampitsipeki, oinijantakoyetaka yotanetatsipe ñanarentsipeki sankenayetanchari.

Paperipekika ari ari piñanake otsi kenkitsarentsipe yoinijantayetakeri sankenayetakerori aparope, timakanakerori aisati ora videojuego jitachari "Gamesitrán", ayoyetantajearori pashiniyetatsiri nampitsipe ara "añantantsiaabakachari", ajatantyari okantasiyetapaka inchashipe jeri añainkariepa ara "Obanenkaroo Antami (selva)" jero akenakoyetanake oinijanteri ora "Ajate nampitsiki jitachari Inkite".

Apasonkijeitiri amenakotakerori ikoyajeitancyarori iroperoyetatsiri kenkitsarentsipe sankenayetainchari kametsa, kemperi: iriperori sankenabereanti Ricardo González Vigil, amenakotakeriori oshitobakotantyari Anahi Barrionuevo jeri jibabentirori kiribirope jero ñanarentsipe antabetatsiri ara Ministerio ashi Cultura, Leonardo Dolores.

Apasonkijeitiro aisati ora Ministerio ashi Cultura amitakotakeri aretayetakantyarori nampitsipeki ñanarentsipe baakotainchari ñaanetsantsipe kechoa, aimara, awajún, ashaninka, shipibo-konibo jero kukama-kukamiria. Aisati apasonkitiro Minishiterio ashi Oametantsi, ñanatakayerone kiribiropeka ara jitachari Paln lector, iriyotakojeitancyarori jananekipe jeri ebankariepa impoiji ebankarope okantakota kareterape ashiyakoyetantari, aisati apatorentsipe anampsato jero pokayetatsiri amitakotirori ora ikantetiri Educación Básica Regular.

**Verónica Zambrano**

Jibabentirori ora Consejo Directivo del Ositrán






1.er puesto

# GAMESITRÁN

NICOLAS JHAZEL PAURO ORTIZ

Institución Educativa Los Peregrinos (Lima)





Aretapaja pashini kitaiteri. Iro meka imposapajero iye ashitakorontsi impantyanari pashini kiribiro ñabentakotirori yantiri irantaberekì obakerari yamenakobentirora jitachari Linea 1 ashi metro.  
¡Yasamakanaro kiribirope yamiri!

- Ari opoimatanake ashitakorontsi tok tok.
- David, ¿Paita pikoiri? shintsini nakanake, kantimaitacha te onimotena.
- Iye, namakemi pashini kiribiro, ari pinebetakearo, te oshiyaroji pashinipe nopakemiri.
- ¡Ari nakamampeakeri, ¡Aaa! Kametsatake.

Nashitareakerora ashitakorontsi, nokemati otsirekakena noboroki aparoni paperi potsoyetachari tsikonteyetachari.

- Jero iye, kimoshire ishirontakena. Kiribiroka, te oshiyaroji pashinipe nopayetakempi. Obakera noñajiro osaikaiti kajoniki nashitakotakeri yaabiki.
- Arike David, pasonki. Eiro nokantimonentantari nokantakeri, ari noñanatakero jaoka okantapaintya. Nashitanakero meka ashitakorontsi.





Ari ikantari iye,  
timatsirika inebetari  
eiro ijokirotsi okantani  
ikenkishiriapinitiro.  
Ipetakerira irantabete  
ara jitachari Linea 1  
ashi metro, kempe iri  
yamenapinitiri aparoni  
ikantetiri *toutuber* terika  
*stremer* iriperori.

Osheki nokenkitsataketakaro ina okanta yantanatana David aririka iramapinitena kiribirope ñabentakoyetirori betsikantsiyetatsiri, kareterape, oshiyakoyetara shiyakomentotsipe jero pashiniyetatsiri. Ipetakerira ijibabentero antaberentsi, te isaikakayena kametsa osheki iñashirenkana yamayeti kiribirope.

Ari oshirontana ina impoiji irosati okantapinitana okoirika akena:

—André, aparope kiribiro iointi yotanetantsi ipetimpiri. Maroni ipimiri pirenti ari yoinjairori inintimpi, kemperi narori okantani namenayeti piyoyetantyari osheki jero pashiniyetatsiri.



Namenanaiti okantakotiri kiribiro noñati okanti: "Ositrán, notsipatami nokenayeti anampiki Perú". Te okantimotyanaji nokante pita oñabentakotiri osankenaitoki noñanatakeri. Ari nobakero onampinaki nomamento impoiji notimabentiro nonebesanotari narori, noñatsayetaro ñatsarontsipe. Irosatira noñatsataro ñatsarontsipe kimoshiretakanari, opokimotakena nokenkishiriamentoki okantiri osankenaitoki, ari meka abisake kapichaji minoto opokimotapakena meka noyotero pita oñabentakotiri.





Nokematiro okajemakena ina, anta  
intainajenka, aretapaka abajeitya.

—¡Nakanakero meka —¡Korakena ina! tempa  
poimatake notsomonte okantakantiro notashe,  
shintsi nanitanake nobantyari, nojokanaitiro  
noñatsaro. Ari okantari aretapakiarika  
nobajeitya.



Ari nosaikajeitapake meesaki David, narori jero ina. Maba nokarajeiti noshaninkaki okantakantiro ijokajeitake apa peerani ikamantakari oposakeri shiyamentotsi pashiniki nampitsi jitachari Canadá, ijtantakari irameni antaberentsi. Okantabetaka abisake osheki osarentsi irosati okatsimojeitana ikamake apa, irokantacha, irosati yañi nasankaneki.



Abajeitara, nokenkishiriakero  
osankenaitoki kiribiro ipakenari David  
inkarankineronka ara apite oria.  
Noyosanotantyari nokantakeri:

- ¿Iye, pikoi nosampitempi okantakota  
kiribiro pipakenari?
- Yakanakena —¿Piñanatakero?.
- Tekeratsita
- ¿Paitakea pisampitantyanari tekerara  
piñanateroji?
- ¿Iye David, pikoi nosampitempi?
- Ari yakakena —Je.





—Pikantena, ¿osankenaitoki ñanarentsi kantatsiri Ositrán, notsipatami nokenayeti anampiki Perú, iro oñabentakotiri betsikantsipe? —Iro nosampitakeriri impoiji yakanakena.

—Ari okantari, Ositrán irointi aparoni apatorentsi amenakoyetirori betsikayetachari, ariorika piñanatakerō kiribiro ari piyotakotakerō maroni betsikantsipe, te apinto amenakotero betsikayetachari. Irointi apatotirori antayetachaneri amitakotantsikipe aka Irimashiki terika pashiniki ikantetiri *departamento*. Maroni antayetachaneri amitakotantyariri atiripe irantabejeite, antarotakantyarori anampitsipe.

—Pasonki, iye, iro nokantanakeri notsonkatantana jearori akenkitsajeiti.





OSITRÁN



Namenanaiti nonampinaki noñatiro ina amenana. Ari nokenkishiranakero impoiji opokimotapakena noyotakotero paita oinijayenari kiribiro.

Notsonkanakerora nobajeita, nojatanake namenayeti kompotaroraki noyotakotanyarori paita antakantiri Ositrán. Namenakera interineki otsitenitimatapakena noki, tsiteni okantanaka. Namenanaiti, noñati oshishiyakota ora jitachari línea 1 ashi metro, noñati aisati osokijayeti jero areyeta antarope boke aatapinitira jitachari Callao amayeti osheki shima, oshero jeri kantashiyetachari shebatyakipe.

Aikero namenanaiti noñatiro jaoka anitapiniti arakomentotsi aretachari Irimashiki jitachari Jorge Chávez, antarope arakomentotsi arayetachari.

Namenanake aisati osabiki noñati osheki shiyakomentotsi shiyachari shintsini kareteraki shimintotainchari.





# OSITRÁN

EL REGULADOR DE LA INFRAESTRUCTURA  
DE TRANSPORTE DE USO PÚBLICO







—¡Ooo! —Te noyoteji jaoka ojitari nosaikakera, kantimaitacha okametsatimotakena noñakeri. Irokantacha, opoimatira boshina amenakanakena pashiniki nonamina, noñatiro antarotsantsa shiyakomentotsi jitachari ¡tren eléctrico! Iro nokoabetari nontetyaro tempa ari irantabetiri iye David.



Impoiji okonijatapake sankenarentsipe oinijanta maroni antayetiri ora meka añabentakotiri Ositrán. Ariorika nantake aparoni clic oshitobapake osheki kamantantsi, kemperi, janika jibatakantirori, jaoka opoñari jero jaoka otsonkari, janika tedarori jero pashiniyetatsiri. Aparope oinijantsi ikonijatapake oinijantirori amitakotantatsiri ariorika antetyaro.

Ari meka notsonkanakero  
namenayeti noyompotarorateki,  
okantabetaka okonijatimotakena  
osheki oinijantsi, nopianakero  
aisati shintsipaite, te  
noyotabakero jaoka nokanterori  
namenantajiarori. Kantimiatacha,  
noyotakotanakero maroni  
noñakeri, tekatsi meka  
amatabitenane. Abisanake  
kapichaji sekonto, noñatiro  
sankenarentsi osaiki  
ashitakorontsiki okanti:  
“Ositrán, kitaiteripeki inintetiro  
aisati iro kametsatakajerone  
shiyakomentotsipe timatsiri  
anampipeki. Pasonki  
paretimotakena”.






# OSITRÁN

**Kitaiteripeki  
inintetiro aisati iro  
kametsatakajeron  
shiyakomentotsipe  
timatsiri anampipeki.  
Pasonki paretimotakena.**

Abisake osheki osarentsi  
abishimotakenari oka meka  
nosankenatakotiri. Irosati  
nokenkishiriro kemperi aparoni  
ñatsarontsi. Irotakekea, meka  
noshitoriatirora ikantetiri infomática,  
nokenkeshiriaka noinijantero,  
noñake jaoka nompajiterori kemperi  
Gamesitrán. Ari iñastajeityari  
jananekipe iyotakotantyarori jaoka  
okanta ashiyakote anampitsiteki Perú.  
¡Pobetsikempaya!







2.<sup>do</sup> puesto

# Añantantsi aabakachari

GABRIEL OCHOA GONZALES

Institución Educativa Alfredo Rebaza Acosta de los Jazmines (Callao)





Abisake aparosati nampitsiki Irimashiki oshekitapake ashereantsi, aparoni ebankari jitachari Martín añatsiri kitaiteripeki iñiro shiyakomento jitachari Linea 1 ashi metro timatsiri Irimashiki. Obakera irijanikitapake Martín iro yamenapinitiri okanta abishi ojenokireki nampitsi shiyakometotsantsa jitachari tren, tetiriri osheki atiri koatsiri iriiperote jero pashinipe.






Yoka meka Martín isaikimotiro kempeji okatiyapinita ora metro. Okantani kitaiteripeki ikatiya yashitakoroki ibanko yooyakotiro abisamanaje tren. Ari ikenkishiriabeta jaokapaite intetyaro iriori ishiyakote iñaantyarori jaoka okantari shiyakomentotsi jero jaokaokantari nampitsi. Kamtimaitacha, maroni ikenkishiriabetari Martín iñakero eiro omonkaratatsi. Iriri jero iriniro te antetyariji kapichaji kireki yaabetari yantabejeitira kitaiteripeki, ishiyakotantyaro ara metro eiro imatirotsi.





Iyotashiriaka Martín abishimotiriri,  
kantimaitacha irasankaneki  
ikoake iyotero paita timatsiri  
arejiki yamenakotirori nampitsi  
ibankoki. Aparoni kitaiteri, yaniibetira  
okatiyapinita shiyakomentotsi, iñake  
aparoni sankenarentsi kantatsiri janika  
koatsiri isankenatakotero abishimotiriri  
okantakantiro shiyakomentotsi timatsiri.  
Ari meka ikoanake iroinijantero  
abishimotakerir, ari isankenatanake.

Ikenkishireakerora kenkitsarentsi, meka  
Martín isaikake imeesateki isankenatapiniti,  
iperishitantake aparoni kompotarora,  
ari isankenatake. Isankenatakotakeri  
aparoni jananeki jitachari Lucas koatsiri  
ishiyakotantyaro tren abisatsiri inampiki.



Dirección Villa el Salvador

MIGUEL GRAU

Dirección Villa el Salvador





Isankenatakotakero maroni abishimotakeriri Lucas jero kariperoyetatsiri kemperi ora, te otimimoteriji kireki ipinabentyari itetantyari. Martín iri Irokashitatsiri, iriperori jananeki koatsiri itetyaro jero inkakijityaro tren iñaakera pashinipe atiri itetaro aretapajearika okatiyapinita, ikenkishiriakero jaoka okatiyapinitari aisati. Aikerora ikenkitsatakota, meka Lucas abishimotakeri kametsatyetatsiri, iyoyetakeri iriperori atiripe yoinijakeri abishimotakeriri shiyakometotsiki jitachari metro.

Ebankarika sankenabairenti  
isankenatakotakero maroni  
ikenkishiriakari, maroni  
ñantsipe isankenatakeri te  
okomitimotyariji. Isankenatake  
aparoni jero oniyankireki  
paperi, kantimaitacha iyotake  
koichatya impoitapaintsiri  
itsonkantyarori  
isankenatakotero  
abishimotakeriri.



Kimoshire ikantaka Martín,  
isankenatakotakerora okanta Lucas  
itetakaro metro. Aparoni apatorentsi  
amitakotantsiri oñakeri yantakeri  
ari opakeri aparoni pasaje itetantyari  
ishiyakote nampitsiki. Kenkistarentsiki,  
kimoshire ikantaka Lucas  
ishiyakotara nampitsiki,  
iñayetakera kari iñapiniti  
timatsiri Irimashiki.



Meka Martín yamenakero  
isankenatakeri, ar  
ibetsikakotakero kapichaji  
eiro abisantatsi apite paperi  
iyenkitsare.

Yamenakero omonkaratanyari  
okoakantiri sankeanrentsi,  
kemperi osankenatyara  
calibrí, oberaya aparope ñantsi  
12, ontsirekea kametsa jero  
omonkaratyá 3 cm aparopeki  
onampina sankeanrentsi.






Ari meka aretaka kitaiteri  
ipakantantzorori isankenare.  
Itiyankakero Martin iyenkitsare,  
antaro okantimotakari  
ikenkishiriakara iroinijantero  
iñakeri jero abishimotakeriri iñirora  
metro timatsiri nampitsiki Irimashi.  
Iyotake, okantabetakea impeakea  
teerika iroimoshirenkaiteri, iro  
kimoshiretakakeriri isankenatakeri  
iroinijantzorori inebetari kemperi ora  
shiyakomentotsipe.





Abisake kitaiteri, aretimotakari  
kamantantsi kantatsiri: Ikoyaiteakero  
piyenkitsare sankenarentsipeki.  
Okantabetaka te yaretyaro  
itarori, kimoshire okantanaka  
irasankane iñakerora ikoyaitakero  
isanekantakotakeri.

Ari meka Martín iyotakotanakero, okantara abishiro tren  
nampitsi, ari okantari irori sankenarentsi, ari oinijayetake  
kari añapiniti ariorika asankenatanake akenkishiriari.







3.<sup>er</sup> puesto

# Obanenkaro Antami (selva)

RICHARD DEL PIERO SAAVEDRA MONTEZA

Colegio de Alto Rendimiento (COAR) San Martín







Aparoni ironeshi, beraka iko jero iniyankire  
oria, kemperi nantapinitiri kitaiteripeki,  
notinamana, naninaniti, nokitsatakaro noitsare,  
obakana jero betsikakana nojatantyari  
yotantsipankoki; kantimaitacha te iro nanteri,  
irosati nopashika nomai, nomishiyeti, antaro  
nobochokine. Iro nokenkishiriakari okantapinita  
nantapinitiri tekera otsonkatya oametantsi,  
mekakia tsonkanaka oametantsi. Nokemati  
opoimatanake terejono akotsijeitira. Irinti ashi  
ina osaiki okotsiti nobamañari. Ari notinanaka  
nonariaitani nomamentoki. ¿Janika  
kajematsiri?, irinti iyetsori Nacho jeri pabachori  
saikatsiri nampitsiki jitachari Moyobamba,  
abisake osheki kitaiteri te nokenkitsatakayeri.

Ari noshianaka osaikira ina okotsiti, ari naapitsatapakero shintsini ina serorari, te noyobentanakea.

—Ari nokantanake, ¡¿Jaoka pikantajeitari ara?! —Meka yakanake pabachori:

—Kametsa notyomiji Adrian. Nobetsikajeitatya notsipatari pirentitsori nojajeite namenero oinijayetachari nampitsiki otsonkakara osarentsi, iro nokantirori piniro pipokajeitantlyari pinkibantajeitena noinijantyamirori iyotanepe saikatsiri nonampiki.

Kimoshire nokantanaka, tempa irobakera noyotero nampitsi San Martín, anta Moyobamba.

Notsonkanakero nokenkitsatakairi pabachori, okantakena ina ari ajajeitake akibanteri.








**SUPERVISA LA CARRETERA  
IIRSA NORTE: PAITA-YURIMAGUAS**



Okitaitamanake, nojatake meka notsipatanakaro ina jeri apa nopoñanaka nonampiki jitachari Olmos, Lambayeque. Noshiyakotanaka meka kareteraki poñachari nampitsiki Paita irosati aretantakea Yurimaguas oipatsiteki Loreto. Antaro nokimoshiretake noñero ikantetiri antamimashi (*Selva*) nokemakobentiri yotantsipankoki, okanta ikenkitsatakota chullachaqui, sashinti jeri yacumama, atiripe saikajeitatsiri, maroni yamejeitari, kantashiyetachari añinkaripe shonkimotirori isaikira pabachori.



Noshiyakotaka osheki oria. Nabisakotantakari otishiki noñake atiripe irantabejeiti ibayeti shiminto eiro otrankantatsi. Kametsa yantabejeiti atiripe, noñati meka itapiiki aparoni antabereanti osankenataka obajiro antakantiro antaberentsi, osankenataka Ositrán. Omapero nopasonkitiro antayetiri tempa iro amenakotirori eiro otarankantayetatsi kareterape.







Noshiyakotara shiyakomentotsiki, noñayetake antami, obinteni, otishi, otenkanape timatsiri anampiki Perú, okametsatimotakena maroni. Oshekira namenayetake kametsayetatsiri aapakena nobochokine irosati nomaantanaka impoiji notinanaka iñanatakenara apa noyempitaki:

—¡Adrián, iro aretyaro aretapinitara shiyakomentotsi!

Namenanake netsikiaji, noñati pashini okantashita katsirinkajenkaite, te oshiyaroji okanta okatsirinkaiteti nonampiki Olmos, kametsa okatsinkaiteti.



Notinasanotanakara impoiji namenayetanake, noñati narejeitakaro nampitsiki jitachari San Martín. Ari amaa jeitake orijanikiki nampitsi, ara oteriki, imaa jeitira areyetachari. Noñita meka okantashita antami, te oshiyaroji timatsiri nonampiki Olmos, osheki inchatoshi. Namenakero meka ina impoiji nosampitakero:

—¿Jaoka asaikajeitakeri oipatsiteki San Martín?

—Ari akanakena ina. —Aretakaro nampitsi jitachari Aguas Verdes, okakijitarori Antami amabentakotachari jitachari Alto Mayo. Ari intanakearori ajate, tempa noyojeitake osheki pinebetaro pamenero antami irotake asaikajeitantzayri aka.





Kimoshire nokantanaka, ¡noñero jaoka okantari antami amabentakotachari, jaoka okantari inchatosipe jeri piratsipe timatsiri oipatsiteki San Martín!

Atejeitakaro meka aoto aanakeri osaikira antami amabentakotachari. Ari noñanatake paperi oinijantirori antami. Ari isaikajeitiri añinkaripe kametsayetatsiri, abisake kapichaji minoto, naretaka, ari ipokapake ikantetiri guardaparques impoiji yaanake iroinijanteri.





Namenayetake okanta oshekiti inchatoshipe, kempe te otsonkiaji amenero, noñake ora jitachari bromelias shiyabetarori potsori carmesí oshipeki. Ari nosampitakeri tsipatakeri:

—¿Ari okantake ajate amenero inchatyaki jitachari orquídea zapatito fucsia? Noñakero oshiyakantakota kamantantsiki.

—Yakanake —ari ebankarianiki.

Akiajeitanakera, oshonkake osheki antami.  
Noñake yarayarati shabeta jitachari  
morpho asoriri, imimijata jero ishishiyata  
keniri, iro noñabake irishi kiteriri  
imimijatara inchatoshiki.



Nojiti noñakeri maroni timayetatsiri, kantimaitacha  
noñake inchatyaki jitachari orquídea zapito  
fucsia oshiyoki inchatoponkitiki. Okantabetaka  
nanijeitake osheki, kimoshire nokantaka. Iro  
shiyariri oro fucsia timatsiri antamiki. Kimoshire  
nopyajejitaja nomaajeitira, ari nomakoriajeitapake  
nabisantanakeari noshirejeitakarora.



Okitaitetamani, aanake pashini aoto osaikira antami jitachari nuwas, aimatakena noñero impoiji nosampitakeri apa jaoka okantari, ikantakena ari piñashitakearo. ¡Te okantimotyanaji, nokoi noyotero jaoka okantari! ari nokenkishiriabeta apaniro.

Ashiyakojeitara, arejeitakaro intarori peaje timatsiri nampitsiki San Martín, noñaabetaka osheki noshiakotara kantimaitacha te noyote paita otimantari.





**Contigo en tu ruta**

Contáctanos:

0800-11004

986 847 155

[usuarios@ositran.gob.pe](mailto:usuarios@ositran.gob.pe)

[www.ositran.gob.pe](http://www.ositran.gob.pe)



—Ari nosampitakeri aparoni antabetatsiri, ¡Notsimabintsare! Chora kantimitakenari, ¿paita otimantari peaje? Ari yakanakena ikametsashireti:

—Iroperotati, ari ipinatiri antakoyetirori shiyamentostsipe abametsatantyarori karetera, amitakotantyarori shiyakomentotsi jero pashiniyetatsiri amitakotantsi.



Abisake kapichaji minoto arejeitakaro ashiretakari.  
Opokajeitapake tsinanepe okitsatakaro oitsare. Okitsajeitakaro  
kitsarentsi kityonkari impoiji otsanoikitakaro chobankiriki.  
Namenakerora okanta okitsajeitaka, noyotanake irointi  
tsinanepe ñabetirori pashini oñane. Aajeitanake oinijanteri  
opankiyetara inchashipe abintantatsiri impoiji oinijajeitake  
tsanoirekipe obetsikayetiri aparope.





Ari meka nojatashitakero aparoni tsinanejaniki shiyabetanari okarati nosarentsite ojita Kuwishi, shiyakabentorori inchatyaki orquídea iñaneki awajún. Akenkitsajeitake osheki, ari oinijakena impoiji opakena aparoni tsanoirekintsi obetsikakeri, obetsikantakari chobankiriki. Oñanatakena oñaneki awajún. Okantakena, opajitantakari antami ashi nuwas tempa iyoshita osaikajeiti tsinanepe. “Nuwa” oshiyakabentaro tsinane oñaneki awajún. ¡Kametsaiteni okanta!





Kametsa nabisakero kitaiteri, kantimaitacha  
aretaka oria ajatantyari nampitsiki Moyobamba.  
Ashiyakojeitaka apite oria irosati aretantakaro  
onampitsite San Martín. Meka ipokajeitake  
nirentitsori jeri pabachori nainiriajeitapakera, antaro  
nokimoshiretake añabakajeitakara.

Ari yajeitanakena oinijantara timatsiri nampitsiki, arejeitapaka intantyarori ibeshireajeityaro beshiriantsi yametari nampitsiki Moyobamba, ibeshireajeitari aretapakearika San Juan, ora jitachari pandilla moyobambina. Kametsa okanta beshirantsika. Impoiji ajajeitake opimantayetara obanarontsipe ikotsiyetiri, ari nobakarori ikotsipinitiri, obanarontsi jitachari joaneshi, irikea apa ikoake ora takacho jeri cecina, iriori pabachori jeri iyetsori yobaka akiparentsi.



Ari okanta nabisakero kametsa kitaiteri.  
Noñayetake timatsiri ara jitachari antami  
(selva) kemperi, añinkaripe, yameyetari  
jero yobanarope. ¡Kametsaitake areetyaro  
ikantetiri antami (selva)!

## FERIA GASTRONÓMICA






1.º puesto

# Ajate nampitsiki jitachari Inkite

SERGIO CUIPA GARCIA

Institución Educativa Privada Fractal (Lima)



Aparoni kajemantsi serorariki okamantake akatiyakojeitape kareteraki. Ashiyakojeitini shiyakomentotsiki jatatsiri pashiniki nampitsipe kemperi jitachari Inkite. Ora nampitsi saikatsiri tonkarimaji. Antaro nokimoshiretake okantakantiro oinijakena yometinkaro jero kiribirope okantakota okametsati nampitsi, ari aňenkatirori kimoshiretsi. Kantimaitacha, noshiyakojeitara, chora kantimonakanari noňakeri apa jero ina imajerejeiti impoiji ibashirejeita.




Nokenkishiriaka, tempa irointi kametsari nampitsi. Irosatini nirijaniti nokemakobentiro nampitsi jitachari Inkite, iro nojokashiriake Inkite isaikira Tasorentsi. Te noyoteji paita opajitantakari Inkite irosati nantaritantaka, nojatantakari inampiki nocharinepe. Nampitsira ijiyetiri Inkite terika ora Hanaq Pacha (kechoaki) osaiki sharakamashiki oipatsiteki Apurimac.








Noshiyakotara, noberaka niyankiki, te ompoke  
nokenkishiriane, irosati nokenkishiriro naretyaro  
isaikira tasorentsi. Aikero nokenkishiranakaro Inkite  
noñakerora inchatoshi kametsayetatsiri jero obakerari  
kareterape. Iro jokashiriakakenari naretyari. Obakerara  
otimi soti nosarentsite, te noshitobabeteji pashiniki  
nampitsi iointi nosaiki Irimashiki. Iointi noñayeti  
antarope pankotsi, otishi kamarari jero pankotsipe  
bashinonkachari. Irotakekea, nojatantakari pashiniki  
nampitsi kimoshire nokanta noñayetiro timayetatsiri.






Nojokanakerora nampitsisanori nosaiki, noshiyakotanaka kareteraki abisatsiri otsapijaki antaroite nija jitachari Océano Pacifico. Ora meka karetera tsantsari noshiyakotara ojita Panamericana. Ari noñayetake kametsayetatsiri, kemperi, noñake obintenimashi jero antaroite nija, nokemakeri iyatsirinkare oriatsiri jero otampiajenkare antaroite nija. Okantani ishiyakanti pashini atiri notsipatari noshiyakota, iromacha ishiyakantayeti iroinijantyariri ishaninkape terika itsipamintsare jaoka okantakari yaretantakari nampitsiki jitachari Inkite. Meka nokantakeri apa, aririka aretapakea pishiyakantakotanaya osheki, tema te okantapinityaji aretyaro nampitsira kametsatatsiri.

—Ari okantakea nonkie nampitsiki jitachari Inkite tempa te nompiyatsatyami, ¿temari apa? —Iro nokantakeriri. Ikemakenara nokantiriri, yabitsanotanakena shintsini.



Abisake apite oria, akatiyakojeitapaka pashiniki nampitsiki timatsiri okenkitsatakota, ojita Nasca. Ari meka okenkitsatake ina okanti, aka meka provinvia chora antaro tsaparipe tsapatachari kipatsiki kari shaachane. Te ayoteji janika tsapatakerori, kari atiri tsapaterone. Nokemakerora okenkitsatakenari ina nokenkishiranaka iroyaata naretyaro nampitsi noshiretakari. Okantabetaka te noñero okakiji tsaparentsipe, namenakotashitakaro noshiyakotira shiyakomentotsiki, ikantetakena, ariorika ampiyaje abankoki ari ankatiyakotapainte amenatyarori okakiji tsapariyetatsiri. Ari okantakari. Ari nokenkitsatakero Nasca jaoka okantapaintya



Kapichaji nokatiyakotapainta nampitsikika nobajeitantlyari impoiji nokenakotanake kareteraki kenatsiri ishitobakapera oriatsiri. Ajokanakero antaro nija jitachari Océano Pacífico jero impanekimashi ari akiakotanake okenashimaiteti, otimapakera osheki otishi jero aparoni nija shonkashonkatachari kemperi maranke (iro ajatakotanakeri) aisati kametsari inkite asoriritatsiri kempe ochorentakero antaro nija nabisanakeri. Ora meka shiyakomentotsi, netsikeaji oshiyaka tempa osheki oshoshonkata karetera.

Tekatsi okomitakea, jiro arejeitya ashiretakarora kipatsi kametsatatsiri!



Ari otsitenitanake. Namenayetirora timayetatsiri, apa jero ina ikenkitsajeiti ikanti, perani aretyaro sharakamashi kobenka okantani, te aňeroji kametsa karetera, tekatsi otamentotsi jero oinijantirori jaoka ankeneri ashiyakote, ashiyakotyarika osheki kipatsi aisati osamani aretantlyari.




Tera okametsateji karetera tsaroantsini ampariyakote. Ari okantabeitaniri perani, meka abisanake osheki osarentsi kametsaitetanake. Shintsini aretya nampitsipeki, kimoshire akantajeita. Obetsikanakara kametsa kareterape, osheki jatatsiri ikibantiri ishaninkape. Okantake ina, meka timatsi amenakotirori onkametsatanyari kareterape, ojita Ositrán. Maroni antabetimotirori akante iri amabentakotantatsiri, nokenkishirianaka narori, tempa iri amenajeitirori ashiyakotanyari shiyamentotsiki.





Irosatira noshiyakota, nomaapainti kapichaji, nokematiro okatsinkaitetake ari napinaikakaro aparoni pooncho timatsiri osheki obotsoro, nosaikakera obentanateki shiyakomentotsi. Kametsaite noñakero okanta oipatsite anampi Perú noshiyakotara. Kimoshire nokanta. Meka shiyakomentotsi okiakotanake kareteraki kenatsiri otenkanapeki, kemperi ara ankeanakerika kiribiroki ariorika añañatananake. Noshiyakotaka tsitenipaite, kametsa noñateyake okantakantiro okiteisantetake tsiteniri. Maroni noñayetakeri nojiti nomishitatiro, kantimaitacha, abisake osarentsi noñakero noshiyakotaka tempa anampi kametsa okanta.





Oniyankitakera noshiyakota, noshiyakota kareteraki  
tampatikatatsiri, te noirinkakotajeji. Iro okitaitetantanakeari,  
noñaka noshiyakotaka menkoriki, iro noñakeri, tempa ora  
karetera nabisantakari okitamarojenkatake okantakantiro  
otimake osheki menkori. Te onkinojaperotajeji okenashibeitani  
onampinapeki karetera nokenira noshiyakota.




Impoiji meka okiteisantetanaji, konijayetanaji maroni timayetatsiri noshiyakotara.

Nojitate, naretakaro ojenokireki kipatsi asaikajeitantari maroni. ¡Nokenkishiriaka jaoka okenayeti kareterape!, nañenkatakero tampeajenka kitetatsiri aretachari ashireki. Abisake osarentsi niyotake ari nabiskotakeri ojenokitapake anampi Perú jitachari janca jero cordillera, okatsinkaitetapake osheki impoiji kamarankabetakenari okantakantiro otimi jitachari “omantsiyare tonkarisato”.



Nabisayetakerora noshiyakota otishipeki sharakasato,  
noirinkakotaja meka, noñayetake piratsipe jitachari  
yaama jeri aripaka isaikajeiti pashitariki irosati  
naretantakaro nampitsi jitachari Apurimac.

Naretakara, opariyake inkani kemperi iraaka  
nampitsi okimoshireti narejeitaka. Ari noñapakero  
nampitsi kametsaiteni, oshonkakaro otishipe  
kenashimashitatsiri jero aparoni  
nija kemperi ñanatakenari.



Noshiyakotakara soti oria, nanjeitapake napitsijanikiki jitachari Cotaruse, ari ibetsajeitabake atiripe okantabetaka te irijojeitenaji. Ipajetabakena yobanarope, kemperi: shinki, keeso jeri chariki. Maroni atiripe isaboinataka jero ikitsataro pooncho. Ari ikantakena apa, iro aretya nampitsiki jitachari Inkite, nampitsi ashiretakari, otimatye anitabake kapichaji.



Aretimataka nampitsiki, nosaro Macaria oshiyashitabake aotsiki. Akantajeitiro “ina”. Mabatake okarati noñiro nosaro. Intakaro noñakero aretantakeri Irimashiki otsipatari nocharine. Osaimotake osheki kitaiteri nobankoki saikatsiri Irimashiki. Kimoshire notsipatakaro, oninatakena, okenkitsayetakena kenkitsarentsipe impoiji okantakena jaoka okantari onampi osaikantari. Obakera meka noñakero onampi, isaikajeitira nosaro jeri nocharine. Ari noyotakerori paita kari yamejeitanta irimashiki. Isaikajeitira kametsaiteni okanta jero kimoshire isaikajeiti.

Kantimaitacha, noñakero nosaro obashireta. Ari abisatsotakeri apa jero ina irajetaka osheki. Obashiretakari nosaro okantakantiro imantsiyatake nocharine, kapichaji okarati yañabaje, iro ikantakeriri abintantatsiri saikatsiri Chalhuanca.



Ari abisajeitapake imamentoki, noñapakeri nocharine inariaka ibashirekeataka, te noñapinteriji ibashiretya. Ariorika notsipyatyari kimoshire ikanta, meka noñapakeri matsa ikantaka. Ikoabetame ishirontya iñajeitabakera kantimitacha te imatyaji. Noñakerira ijokitaka opokimotapakena nokenkishiraka nokanti ¿tempa ikanteti nampitsikika kametsaite okanta? ¿otimapake osheki kimoshirentansi tera añapajero katsinentantsi? Te okantimotena noñapakerira.



Obakera ara, abisanakera maba kitaiteri ikitayetantakariri nocharine ikantakena apa paita abisaintsiri. Pashini osaiki nampitsi kametsaitetatsiri, ijatakera nochari ikamantakari tempa osheki ikametsashireti. Nokomitashitakaro nampitsi otimira kimoshiretantsi timatsiri oipatsiteki anampi Perú (¿tempa teoshiyaraji?). Obajirora nampitsijaniki Apurimeño —Inkite jero Hanaq Pacha— iro nojokashiriakari irosatira nirijanikitapake aisati ipajitakara nocharine Jesús.






Ari meka nosaikakeitake apite semana  
notsipataro nosaro, notsipajetakaro eiro  
obashiretantatsi osaikakerika apaniro.  
Kantimaitacha okantake, te nosaikeji  
apaniro, irosati itsipataro nocharine  
iramabentakotiro, isaiki antamiki,  
obankoki aisati shabetaki kitamarori ara  
aratatsiri inchatyakiteki. Ipokaiti ikibantei  
okantake nosaro irakeatakara kapichaji.

Okantani nopolake nampitsikika okantabetaka abisake osarentsipe nabishiro oitaiterite nampitsi. Ari ikamakeri apa aisati, ikitataja nampitsikika itsipatakari ishaninkape. Irosati nokenkishiriro noñantabajariri tekera ikamantakea. Nampitsika omapero okametsaiteri añaantyari impoiji ankamantyari.

Meka nañantariki, timatsi osheki nokenkishiriri nojayedakera noñayetiro nampitsipe timatsiri anampiki. Osheki nonebetaro nokenayeti anampiki Perú, naniyeti aparopeki nampitsi noñantayetyarori jaoka okantayeta aparope. Jaoka okantapaintya kitaiteri tekatsirika nante nojayedti nampitsipeki, te nomakoneteji naniyete jero noshiyakobete.






Iro amitakotakenari nojayeti noñayetantyarori  
nampitsipe kametsayetatsiri kemperi irashi  
nocharine. Nampitsipe timatsiri amayetari jero  
okantayeta aparope.

¡Kametsa kareterape amitakoteiri ayoyetantyarori pashiniyetatsiri nampitsipe timatsiri aipatsiteki! ¡Kitaiteripeki jero jaoka okantapaintya! ¡Kametsa kareterape amitakoteri añayete kari añapiniyeti! Ariorika noshiyakote nojatantyari nampitsipeki, opokimotana nokenkishiriro iyasankapanarote yotaneri peruano jitachari Marco Martos, oka nokematsatiri:

«Iro pinampi oka  
tempa piyotiro jaoka oberari,  
pikoirika piyosanotero,  
ari pampitajero pinkoyajero  
pobetsikantajearori aka  
maroni pikoiri paretyari».





PERÚ

Presidencia  
del Consejo de Ministros

OSITRÁN

Sexto Concurso de Cuentos "Ositrán, contigo por las rutas del Perú"

## ACTA DE EVALUACIÓN

FECHA: 25 de setiembre del 2023

Miembros del Jurado: Ricardo González Vigil  
Anahí Barrionuevo  
Leonardo Dolores Cerna

Luego de realizada la evaluación de los cuentos participantes, el jurado calificador conformado por Ricardo González Vigil, Anahí Barrionuevo y Leonardo Dolores Cerna, se procede a declarar a los ganadores del Sexto Concurso de Cuentos "Ositrán, contigo por las rutas del Perú", en las categorías y en orden de mérito señalado:

PUESTO	CUENTO	ALUMNO	II.EE	PROCEDENCIA
1.er puesto	127 Gamesitrán	Nicolas Jhazel Pauro Ortiz	I.E.P Los Peregrinos	San Juan de Lurigancho, Lima.
2.do puesto	73 Vida entrelazada	Gabriel Ochoa Gonzales	I.E.P Alfredo Rebaza Acosta De Los Jazmines	Callao
3.er puesto	137 El encanto de la selva	Richard Del Piero Saavedra Montez	Colegio de Alto Rendimiento - COAR San Martín	Moyobamba, San Martín
Mención Honrosa	6 Carreteras que conectan sueños	Alejandra Valentina Mayta Bayes	Colegio de Alto Rendimiento - COAR Arequipa	Paucarpata, Arequipa.
Mención Honrosa	99 Desafíos y sueños rumbo a las profundidades	Julio Ricardo Villarez Quiroz	I.E.P Alfredo Rebaza Acosta De Los Jazmines	Callao

PUESTO	CUENTO	DOCENTE	II.EE	PROCEDENCIA
1.er puesto	16 Tour al cielo	Sergio Cuipa García	I.E.P Fractal	Mala, Cañete, Lima.

  
RICARDO GONZÁLEZ VIGIL  
Presidente  
LEONARDO DOLORES CERNA  
Miembro  
ANAHÍ BARRIONUEVO  
Miembro

Callejón Negraica, 169 piso 2  
Distrito: Lima  
Número Telefónico: 011 400 0700  
correo: ositranc@minedu.gob.pe



Síguenos en:



ositranperu



@ositranperu



ositranoficial



@ositranperu



ositran.pe



[www.ositran.gob.pe](http://www.ositran.gob.pe)





KAMETSATAKAIRORI BETSIKANTSIBE OSHIYAKOYETATA  
SHIYAKOMENTOTSIPE ITEYETARA ATIRIPE



AJIBATAKAYERO YOTANETANTSIBE JERO  
BETSIKAYETACHARI ÑANARENTSIBE